



УЛСЫН ОНЦГОЙ КОМИССЫН АЛБАН ДААЛГАВАР

2025 оны 01 сарын 16 өдөр

Дугаар 01

Улаанбаатар хот

Ой, хээрийн гал түймрээс урьдчилан сэргийлэх, тэмцэх зарим арга хэмжээний тухай

Улсын хэмжээнд 2024 онд 14 аймгийн 55 суманд нийт 137 удаагийн ой, хээрийн гал түймэр бүртгэгдсэн. Ой, хээрийн гал түймрийн дуудлагын тоог 2023 оны мөн үетэй харьцуулахад 26%-иар өссөн байна.

Дээрх түймэрт ойн 1406 га, хээрийн 1,504,291 га нийт 1,505,619 га талбай, 1 байшин, 7 гэр, 2 автомашин, 7 хашаа саравч, 19 толгой бог мал өртөж, урьдчилсан байдлаар 10.9 тэрбум төгрөгийн хохирол учирсан байна.

Ой, хээрийн түймрийг унтраах ажиллагаанд Онцгой байдлын байгууллагын 1383 алба хаагч, 153 автомашин, Хил хамгаалах байгууллагын 158 алба хаагч, 26 автомашин, Цагдаагийн байгууллагын 20 алба хаагч, 7 автомашин, орон нутгаас 2827 иргэн, 570 автомашин, 145 мотоцикл нийт 4388 хүн, 756 автомашин, 145 мотоциклтой ажилласан.

Оросын Холбооны Улсын талаас Монгол Улсын тал руу хил даван Дорнод аймгийн Дашбалбар сумын нутгаар 1 удаа, Монгол Улсын талаас Оросын Холбооны Улсын тал руу хил даван Дорнод аймгийн Баяндун сумын нутгаар 1 удаа, Бүгд Найрамдах Хятал Ард Улсын тал руу Монгол Улсын талаас Сүхбаатар аймгийн Эрдэнэцагаан сумын нутгаар 1 удаа тус тус хил даван гарсан хээрийн гал түймэр бүртгэгдсэн.

Монгол Улсын Шадар сайд, Улсын онцгой комиссын даргын баталсан 2024 оны 02 дугаар албан даалгаврын хүрээнд хуурайшилтын улиралд түймрийн эрсдэлтэй бүс нутагт байнгын болон хөдөлгөөнт хяналтын цэг ажиллуулж, гарсан гал түймрийг хохирол багатай, шуурхай унтраах ажиллагааг зохион байгуулснаар ой, хээрийн гал түймэрт өртсөн талбай, учирсан хохирол 2 дахин буурсан байна.

2024 онд Дорнод, Сүхбаатар, Хэнтий аймгийн Засаг дарга нар орон нутгийн гамшгаас хамгаалах зардлаас хөрөнгө шийдвэрлэж, түймрийн эрсдэлтэй сумдад томилгоот хөдөлгөөнт бүлгийг ажиллуулж, гарсан гал түймрийг богино хугацаанд шуурхай унтраах ажиллагааг зохион байгуулсан нь түймрийн аюулаас учрах хохирол, болзошгүй эрсдлээс урьдчилан сэргийлсэн сайн туршлага болсон.

Цаг уур, орчны шинжилгээний газраас ирүүлсэн цаг агаарын урьдчилсан мэдээллээр 2, 3, 4 дүгээр сард агаарын температур нийт нутгаар олон жилийн дунджаас дулаан байх бол 3 дугаар сард нутгийн баруун өмнөд хэсэгт олон жилийн дунджийн орчим, бусад нутгаар олон жилийн дунджаас хүйтэн байх төлөвтэй бол 4 дүгээр сараас дулаарч бусад нутгаар дунджийн орчим байх төлөвтэй байна.

Хаврын улиралд 2025 оны 1 улирлын цаг агаарын урьдчилсан төлөвөөр цаг агаарын огцом дулаарал, хүйтрэл үе үе ажиглагдах, ихэнх нутгаар дунджаас дулаан, хур тунадас багатай байх төлөвтэй байгаа буюу хуурайшилт их байж, салхи шуурга ихтэй байх магадлал өндөр байна.

Иймд Монгол Улсын Шадар сайд, Улсын онцгой комиссын даргын 2025 оны 01 дүгээр сарын 16-ны өдрийн “Удирдамж, төлөвлөгөө батлах тухай” 01 дүгээр тушаалыг хэрэгжүүлэн, биелэлтийг тооцох, ой, хээрийн гал түймрийн аюулаас урьдчилан сэргийлэх, тэмцэх ажлыг эрчимжүүлэх, гал түймэр унтраах ажиллагаанд хөдөлмөрийн аюулгүй байдлыг ханган, олон нийтийн оролцоог нэмэгдүүлж, иргэн, хуулийн этгээдийн хамтын ажиллагааг сайжруулах, ажлын чанар, үр дүнг дээшлүүлэх, бэлэн байдлыг хангах зорилгоор ДААЛГАХ НЬ:

Нэг. Батлан хамгаалахын сайд,
Улсын онцгой комиссын орлогч С.Бямбацогтод

1.1.Тусгай чиг үүргийн нислэг үйлдэх нисэх онгоц, нисдэг тэрэгний техникийн бэлтгэл, бэлэн байдлыг хангуулж, хүн хүч, техник хэрэгсэл очих боломжгүй алслагдсан ой, хээрийн бүсэд гарсан гал түймрийн нөхцөл байдал хүндэрсэн тохиолдолд нисэх онгоц, нисдэг тэргээр ой, хээрийн гал түймрийн голомтод бие бүрэлдэхүүнийг шуурхай хүргэх ажиллагааг зохион байгуулахыг,

1.2.Тусгай чиг үүргийн нислэг үйлдэх нисэх онгоц, нисдэг тэрэгний нисгэгчдэд Гамшгаас хамгаалах тухай хууль, Галын аюулгүй байдлын тухай хууль, Хөдөлмөрийн аюулгүй байдал, эрүүл ахуйн тухай хууль, бусад дүрэм, журмын сургалтыг зохион байгуулж, нислэгийн болон хөдөлмөрийн аюулгүй байдал, эрүүл ахуйн зааварчилгааг тогтмол өгч байхыг,

1.3. Зэвсэгт хүчний нэгтгэл, анги, салбаруудын бие бүрэлдэхүүнд ой, хээрийн гал түймрээс урьдчилан сэргийлэх, тэмцэх чиглэлээр Онцгой байдлын байгууллагатай хамтран сургалт, дадлагын ажлыг зохион байгуулах, шаардлагатай техник, багаж хэрэгслээр ханган, бэлтгэл бэлэн байдлыг хангахыг,

1.4. Зэвсэгт хүчний нэгтгэл, анги, салбар байгууллагын орчим гарсан ой, хээрийн гал түймрийн мэдээллийг Онцгой байдлын байгууллагад шуурхай мэдээлэх, цаг алдалгүй унтраах арга хэмжээг зохион байгуулахыг.

Хоёр. Онцгой байдлын ерөнхий газрын дарга,
Улсын онцгой комиссын орлогч,
хошууч генерал Г.Ариунбуянд

2.1. Ой, хээрийн гал түймрээс урьдчилан сэргийлэх сургалт, сурталчилгаа, түймэр унтраах дадлага сургалтыг аймаг, нийслэлийн төрийн болон төрийн бус байгууллага, хуулийн этгээд, иргэдийн оролцоотой зохион байгуулахыг,

2.2. Төв, орон нутгийн хэмжээнд ой, хээрийн гал түймрээс урьдчилан сэргийлэх үйл ажиллагааг төлөвлөх, унтраах ажиллагааг зохион байгуулахад төрийн байгууллага, нутгийн өөрөө удирдах, нутгийн захиргааны байгууллага болон хуулийн этгээд, иргэдийн оролцоог уялдуулан зохицуулах, тэдгээрт мэргэжил арга зүйн туслалцаа үзүүлэхийг,

2.3. Онцгой байдлын байгууллагын ой, хээрийн гал түймэртэй тэмцэх автомашин, тоног төхөөрөмж, багаж хэрэгслийн бэлтгэл, бэлэн байдлыг хангуулахыг,

2.4. Ой, хээрийн гал түймэр унтраах ажиллагаа, сургалт дадлагын үед алба хаагчдын хөдөлмөрийн аюулгүй байдлыг бүрэн хангуулж, хөдөлмөрийн аюулгүй байдал, эрүүл ахуйн тухай хууль бусад холбогдон гарсан дүрэм, журмыг судлуулан, ажиллагааны өмнө тогтмол зааварчилгаа өгч байхыг,

2.5. Ой, хээрийн гал түймрийн нөхцөл байдал хүндэрсэн үед Гамшгаас хамгаалах тухай хуулийн 6 дугаар бүлгийн 29 дүгээр зүйлийн 29.1.7-д заасныг хэрэгжүүлэн, гамшгаас хамгаалах үйл ажиллагаанд шаардагдах хүч хэрэгслийг дайчлан оролцуулах, тэдгээрийг мэргэжлийн удирдлагаар хангахыг,

2.6. Ой, хээрийн гал түймрийн голомтод олон хоног, удаан хугацаагаар ажилласан үед алба хаагчдад хоол хүнс, өдөр тутмын болон хамгаалах тусгай хувцасны эдэлгээний хугацааг харгалзахгүй нөхөн хангалт хийх, нөөц бүрдүүлэхийг,

2.7 Ой, хээрийн гал түймрийн эрсдэл өндөртэй бүс нутагт, Ойн тухай хуулийн 3.1.17-д заасан хугацаанд ой, хээрийн гал түймрээс урьдчилан сэргийлэх, түймэр унтраах зорилгоор шуурхай хөдөлгөөнт бүлэг ажиллуулахыг.

2.8. Ой, хээрийн гал түймэр унтраах, урьдчилан сэргийлэх ажиллагаанд олон улсын ижил төстэй үйл ажиллагаа явуулж буй байгууллагуудын дэвшилтэд теаник, технологийг судалж, үйл ажиллагаандаа нэвтрүүлэх ажлыг зохион байгуулахыг,

2.9. Ой, хээрийн гал түймрээс урьдчилан сэргийлэх, авран хамгаалах, унтраах ажлыг нэгдсэн удирдлага, бодлого, зохион байгуулалтаар хангах, гал түймрийн улсын хяналтыг хэрэгжүүлэх ажлыг зохион байгуулахыг.

Гурав. Байгаль орчин, уур амьсгалын өөрчлөлтийн сайд,
Улсын онцгой комиссын гишүүн С.Одонтуяад

3.1. Ой, хээрийн гал түймэр гарах эрсдэл өндөртэй аймаг, нийслэл, сум, дүүрэгт Гамшгаас хамгаалах тухай, Галын аюулгүй байдлын тухай, Ойн тухай, Байгаль орчныг хамгаалах тухай хуулийн хэрэгжилтийг хангуулан, ой, хээрийн гал түймэр унтраах техник багаж хэрэгслийн нөөцийг бүрдүүлж, бэлтгэл, бэлэн байдлыг дээшлүүлэн ажиллахыг,

3.2. Ус Цаг Уур, Орчны Судалгаа, Мэдээллийн Хүрээлэнгийн сансрын хиймэл дагуулын мэдээллээр авсан цаг агаарын болон ой, хээрийн гал түймрийн голомт, тархалтын зураг, хуурайшилтын мэдээг тухай бүрд /баяр, амралтын өдрүүдэд/ шуурхай боловсруулж, Онцгой байдлын байгууллагад хүргүүлэхийг,

3.3. Ойн тухай хуулийн 14 дүгээр зүйлийн 14.3.13-д заасныг хэрэгжүүлэн ой, хээрийн гал түймрийн аюултай үед ой, хээрийн гал түймрээс сэрэмжлүүлэх, орон нутагт эргүүл, харуул ажиллуулах болон энэ ажилд бүх нийтийг татан оролцуулах талаар нутгийн захиргааны байгууллагатай хамтран ажиллахыг,

3.4. Монгол Улсын Ерөнхийлөгчийн 2019 оны 153 дугаар зарлигийн 1.4-т заасныг хэрэгжүүлэн ой, хээрийн гал түймрийн эрсдэл өндөртэй бүс нутагт гал түймрээс урьдчилан сэргийлэх хяналтын нислэг үйлдэх зардлыг төсөвт тусгаж, Зэвсэгт хүчний байгууллагатай хамтран нислэг үйлдэхийг,

3.5. Монгол Улсын Ерөнхийлөгчийн 2019 оны 153 дугаар зарлигийг хэрэгжүүлэх төлөвлөгөөний 2.15-д заасныг хэрэгжүүлэн ой, хээрийн гал түймрээс урьдчилан сэргийлэх, аюул тулгарсан тохиолдолд авч хэрэгжүүлэх арга хэмжээ, зохион байгуулалтын талаар олон нийтийг мэдээлэл, заавар, зөвлөмжөөр хангах, нэвтрүүлэг бэлтгэх, сургалт сурталчилгаа зохион байгуулах,

3.6. Засгийн газрын 2013 оны 03 дугаар сарын 22-ны өдрийн 106 дугаар тогтоолын хэрэгжилтийг хангаж, ой хээрийн гал түймрээс учирсан хохирлыг нөхөн төлүүлэх ажлыг хууль хяналтын байгууллага, сумдын ойн анги, нөхөрлөлийн хүмүүсийг оролцуулан шуурхай зохион байгуулах.

3.7. Цаг агаарт зориудаар нөлөөлөх үйл ажиллагаанд шаардагдах төсөв, шаардлагатай техник, тоног төхөөрөмж, сумны нөөцийг бүрдүүлэх, тэдгээрийн аюулгүй ажиллагаа, хадгалалт, хамгаалалтад хяналт тавих, шаардлагатай үед шуурхай ашиглах нөөцийг бүрдүүлж ажиллахыг,

3.8. Ойн тухай хуульд заасан түймрийн аюултай үед ойн сангаас мод бэлтгэх, ойн дагалт баялгийг ашиглах, аялал зугаалгаар явах үйл ажиллагааг тодорхой хугацаагаар хязгаарлах, холбогдох төрийн болон хууль хяналтын байгууллагуудтай хамтран хяналтын байнгын болон хөдөлгөөнт цэг байгуулж, хууль, дүрэм, журмыг зөрчсөн иргэн, хуулийн этгээдэд авсан арга хэмжээний талаар олон нийтэд мэдээлэхийг,

3.9. Ой, хээрийн гал түймрээс урьдчилан сэргийлэх зорилгоор ойн арчилгаа, цэвэрлэгээ, нөхөн сэргээлт хийх, хамгаалалтын шороон болон ойн зурвасыг сэргээх, шинээр нэмж хийх, усан сан, цөөрөм байгуулах ажлыг зохион байгуулахыг,

3.10. Ойн сан бүхий газарт гал түймэртэй тэмцэх, түүнээс сэргийлэх талаар Ойн тухай хуулиар тогтоосон шаардлагыг биелүүлээгүй иргэн, хуулийн этгээдийг Зөрчлийн тухай хуульд зааснаар арга хэмжээ авч, улсын байцаагчийн эрхтэй байгаль хамгаалагч нарын ажлыг эрчимжүүлж ажиллахыг,

3.11. Зөрчил шалган шийдвэрлэх тухай хуулийн 1.8 дугаар зүйлийн 6.10 дахь хэсэгт заасан харьяаллын дагуу зөрчлийг шалган шийдвэрлэхийг,

3.12. Зөрчлийн тухай хуулийн 7.9 дүгээр зүйлийн 7 дахь хэсэгт заасныг зөрчиж ойн сан бүхий газарт гал түймэртэй тэмцэх түүнээс урьдчилан сэргийлэх талаар хуульд заасан шаардлагыг биелүүлээгүй хүн, хуулийн этгээдэд хариуцлага тооцохыг,

3.13. Зөрчлийн тухай хуулийн 7.9 дүгээр зүйлийн 10 дахь хэсэгт заасныг зөрчиж ойн тухай хуулиар тогтоосон шаардлагыг биелүүлээгүй хүн, хуулийн этгээдэд хариуцлага тооцохыг.

Дөрөв. Хүнс, хөдөө аж ахуй, хөнгөн үйлдвэрийн сайд,
Улсын онцгой комиссын гишүүн Ж.Энхбаярт

4.1. Ойн тухай хуулийн 3.1.17-д заасан ой, хээрийн гал түймрийн аюултай үед ургац тариалалт, хураалтын үйл ажиллагааны өмнө тариалан эрхлэгч, иргэн, аж ахуй нэгжид мэргэжлийн байгууллагатай хамтран ой, хээрийн гал түймрээс урьдчилан сэргийлэх, тэмцэх арга хэмжээний чиглэлээр дадлага, сургалт зохион байгуулж, үр дүнг тооцож ажиллахыг,

4.2. Ой, хээрийн гал түймэр гарсан үед түймэр унтраах ажиллагаанд мал аж ахуй, тариалан эрхлэгчийн тусгай зориулалтын автомашин, техник, чирэгч механизмаар дэмжлэг үзүүлж ажиллахыг.

4.3. Монгол орны бэлчээр, ой, таримал ургамлыг ой, хээрийн гал түймрээс хамгаалах, урьдчилан сэргийлэх, ургамал хамгааллын чиглэлээр тусгай хөтөлбөр, төлөвлөгөө боловсруулж, хэрэгжүүлэхийг,

Тав. Хил хамгаалах ерөнхий газрын дарга,
Улсын онцгой комиссын гишүүн,
хошууч генерал Х.Лхагвасүрэнд

5.1. Хил орчмын ой, хээрийн гал түймэртэй тэмцэх чиглэлээр Онцгой байдлын байгууллагатай хамтран сургалт зохион байгуулж, бие бүрэлдэхүүнийг шаардагдах техник, багаж хэрэгслээр хангахыг,

5.2. Хил орчим гарсан ой, хээрийн гал түймрийн мэдээллийг Онцгой байдлын байгууллага, Байгаль орчин, уур амьсгалын өөрчлөлтийн яаманд шуурхай мэдээлэх, цаг алдалгүй унтраах, арга хэмжээг зохион байгуулахыг,

5.3. Ой, хээрийн гал түймэр унтраах ажиллагаанд оролцож буй алба хаагчдын хөдөлмөрийн аюулгүй байдлыг бүрэн хангуулж, сургалт дадлагыг тогтмол зохион байгуулж, хөдөлмөрийн аюулгүй байдал, эрүүл ахуйн тухай хууль бусад холбогдон гарсан дүрэм, журмыг судлуулан, зааварчилгааг тогтмол өгч байхыг,

5.4. Хилийн бүс, хил орчмын нутаг дэвсгэр, хөрш зэргэлдээх орнуудын хил дамнан гарсан ой, хээрийн гал түймрийг унтраах, түймрийн тархалтыг таслан зогсоох, үйл ажиллагаа явуулах үед хоёр улсын томилгоот алба хаагч, иргэдийг хялбаршуулсан журмаар хил нэвтрүүлэх асуудлыг хоёр улсын Засгийн газар хоорондын байгуулсан хэлэлцээр бусад хууль тогтоомжийн хүрээнд зохион байгуулахыг,

5.5. Түймрийн эрсдэл өндөр бүсэд байрлаж буй хилийн цэргийн анги, заставуудад ой, хээрийн гал түймэр унтраах дадлага сургалтыг Онцгой байдлын байгууллагатай хамтран зохион байгуулж, хамгаалах тусгай хувцас, багаж хэрэгслээр хангах ажлыг зохион байгуулах

5.6. Хил дамнан орж ирсэн болон хил давж гарсан ой, хээрийн гал түймрийн талаарх мэдээллийг тухай бүр Улсын онцгой комисс болон Онцгой байдлын байгууллагад албан бичгээр хүргүүлж баримтжуулахыг,

Зургаа. Цагдаагийн ерөнхий газрын дарга,
Улсын онцгой комиссын гишүүн,
бригадын генерал Т.Сүхболдод

6.1. Ойн тухай хуулийн 16 дугаар зүйлийн 16.1.1-д заасныг хэрэгжүүлэн ой хээрийн гал түймрийн шалтгаан, эзэн холбогдогчийг тогтоох, энэ тухай холбогдох мэдээллийг улирал бүр Онцгой байдлын ерөнхий газар болон Улсын онцгой комисст ирүүлэхийг,

6.2. Ойн тухай хуулийн 16 дугаар зүйлийн 16.1.2-д заасныг хэрэгжүүлэн ой хээрийн гал түймрийн аюултай үед ойд зорчих иргэд, тээврийн хэрэгслийн

хөдөлгөөнийг хориглох, орон нутгийн төр захиргааны байгууллагатай хамтран байнгын болон хөдөлгөөнт хяналт, шалгалтын цэг ажиллуулахыг,

6.3. Онцгой байдлын ерөнхий газрын дарга, Цагдаагийн ерөнхий газрын даргын 2017 оны 1 дүгээр сарын 16-ны өдрийн А/16, А/10 дугаар хамтарсан тушаалаар батлагдсан объектын болон ой, хээрийн гал түймрийн үед хамтран ажиллах журмыг хэрэгжүүлэх,

6.4. Онцгой байдлын ерөнхий газрын тэргүүн дэд дарга бөгөөд штабын дарга, Цагдаагийн ерөнхий газрын Экологийн Цагдаагийн албаны дарга нарын 2021 оны 3 дугаар сарын 01-ний өдөр баталсан ой, хээрийн гал түймэртэй тэмцэх чиглэлээр хамтран ажиллах төлөвлөгөөний хэрэгжилтэд хяналт тавьж ажиллахыг,

6.5. Ой, хээрийн гал түймрийн талаарх мэдээ, мэдээллийг хүлээн авсан тухай бүр төв, орон нутгийн Онцгой байдлын байгууллагад мэдэгдэх, харилцан мэдээ, мэдээлэл шуурхай солилцохыг.

Долоо. Аймаг, нийслэлийн Засаг дарга,
Онцгой комиссын дарга нарт

7.1. Ойн тухай хуулийн 6 дугаар зүйлийн 6.5-д заасныг хэрэгжүүлэн ой, хээрийн гал түймрийн цагийн байдлын тухай мэдээг Онцгой байдлын байгууллагад тухай бүр болон хагас, бүтэн жилээр гаргаж өгөхийг,

7.2. Гамшгаас хамгаалах тухай хуулийн 32 дугаар зүйлийн 32.1.2 дахь заалтыг хэрэгжүүлэн, нутаг дэвсгэрийн онцлогт нийцүүлэн ой, хээрийн гал түймэр унтраахад дайчлах гамшгаас хамгаалах алба, мэргэжлийн анги, сайн дурын хэсгийг байгуулах, тэдгээрийг ой, хээрийн гал түймрийн үед үүрэг гүйцэтгэх дадлага, чадвартай болгох зорилгоор сургалт дадлагыг тогтмол зохион байгуулах, шаардагдах зардлыг шийдвэрлэхийг,

7.3. Галын аюулгүй байдлын тухай хуулийн 3 дугаар бүлгийн 15 дугаар зүйлийн 15.1.4-д заасныг хэрэгжүүлэн нутаг дэвсгэртэй гал түймэртэй тэмцэх сайн дурын хэсэг ажиллуулах зардлыг жил бүрийн орон нутгийн төсөвт тусган шийдвэрлүүлэхийг,

7.4 Галын аюулгүй байдлын тухай хуулийн 3 дугаар бүлгийн 15 дугаар зүйлийн 15.1.7-д заасныг хэрэгжүүлэн ой, хээрийн гал түймрийн эрсдэл өндөртэй газарт түймэр тархахаас урьдчилан сэргийлэх зурвас шинээр байгуулах, зурвасыг сэргээх төсөв, төлөвлөгөөг аймаг, сум, нийслэл, дүүргийн Иргэдийн Төлөөлөгчдийн Хурлаар хэлэлцүүлэн, батлуулж, хэрэгжүүлэх;

7.5. Ойн тухай хуулийн 17 дугаар зүйлийн 17.1.5-д заасныг хэрэгжүүлэн, гал түймэртэй тэмцэх сайн дурын хэсгийн ажилтнуудад хууль, эрх зүйн болон гал түймрийн аюулаас урьдчилан сэргийлэх, гарсан ой, хээрийн гал түймрийг шуурхай унтраах мэдлэг олгох, дадлагажуулах, ажилтнуудын бэлтгэл бэлэн байдлыг хангуулах сургалт дадлагыг төв, орон нутгийн Онцгой байдлын байгууллагатай хамтран зохион байгуулж, шаардагдах зардлыг Засаг даргын нөөц хөрөнгөөс шийдвэрлэхийг,

7.6. Ойн тухай хуулийн 17 дугаар зүйлийн 17.2.13-д заасныг хэрэгжүүлэн ой, хээрийн гал түймэр гарсан үед бүрэн эрхийнхээ хүрээнд хүн хүч, техник хэрэгслийг дайчлан, гарсан гал түймрийг унтраах ажлыг шуурхай зохион байгуулахыг,

7.7. Ойн тухай хуулийн 43 дугаар зүйлийн 43.1, Засгийн газрын 2013 оны 106 дугаар тогтоолыг хэрэгжүүлэн ой, хээрийн гал түймрээс учирсан хохирлыг хуулийн хугацаанд тогтоож, тайланд тусгахыг,

7.8. Засгийн газрын 2013 оны 106 дугаар тогтоолын 2 дугаар хавсралтын 1.7.1-д заасныг хэрэгжүүлэн хавар, намрын хуурайшилтын улиралд Засаг даргын захирамжаар хуваарь гарган хөдөлгөөнт эргүүл, шалгалт хийх, шаардлагатай газар нутагт хяналтын цэг байгуулан ажиллуулахыг,

7.9. Засгийн газрын 2013 оны 106 дугаар тогтоолын 3 дугаар хавсралтад заасны дагуу сум, дүүргийн нутаг дэвсгэрт ой, хээрийн гал түймрээс урьдчилан сэргийлэх, тэмцэхэд зайлшгүй шаардлагатай багаж, хэрэгслийг бэлтгэх, бэлэн байдлыг хангуулахыг,

7.10. Ой, хээрийн гал түймэр унтраахад дайчлах гамшгаас хамгаалах алба, мэргэжлийн анги, сайн дурын хэсгийн ой, хээрийн гал түймэр унтраах сургалт, дадлагыг зохион байгуулахыг,

7.11. Ой, хээрийн гал түймрээс урьдчилан сэргийлэх, тэмцэх арга хэмжээний орон нутгийн хөтөлбөр, төлөвлөгөө, шаардагдах төсвийг батлуулан хэрэгжилтийг хангуулах, биелэлтэд хяналт тавихыг,


7.12. Ой, хээрийн гал түймрийн нөхцөл байдал хүндэрч аймаг, нийслэлээс нэмэлт хүн хүч дайчлан ажиллах үед бие бүрэлдэхүүний эрүүл мэндийг хамгаалах зорилгоор харьяа эрүүл мэндийн асуудал хариуцсан байгууллагаас тусгай баг томилон ажиллуулахыг,

7.13. Бүх шатны Засаг дарга нар 03 дугаар сарын 20-оос 06 дугаар сарын 10, 09 дүгээр сарын 20-оос 11 дүгээр сарын 10-ны хооронд хуурайшилтын “аюултай”, “нэн аюултай” зэрэгт хүрсэн үед ойн сангаас мод бэлтгэх, ойн дагалдах нөөцийг ашиглах, аялал зугаалгаар явах болон бусад үйл ажиллагааг хязгаарлах захирамж гарган хэрэгжилтэд хяналт тавьж, олон нийтийн мэдээллийн хэрэгслээр сурталчлахыг,

7.14 Улсын хэмжээнд сүүлийн 4 жилд бүртгэгдсэн ой, хээрийн түймрийн 50 орчим хувь нь Дорнод, Сүхбаатар аймагт бүртгэгдсэн байна. Иймд түймрийн давтамж их тохиолдож буй Дорнод аймгийн Чойбалсан, Матад, Халхгол сум, Сүхбаатар аймгийн Эрдэнэцагаан сумдын төвөөс алслагдсан, түймрийн эрсдэл өндөр бүсэд Ойн тухай хуулийн 3.1.17-д заасан “Түймрийн аюултай үе”-д ой, хээрийн гал түймрээс урьдчилан сэргийлэх, гал түймэр гарсан үед шуурхай унтраах арга хэмжээг авч хэрэгжүүлэх зорилгоор холбогдох байгууллагуудтай хамтран гал түймэр унтраах хөдөлгөөнт бүлгүүдийг байрлуулах, шаардагдах зардлыг шийдвэрлэн ажиллахыг.

Албан даалгаврын биелэлтэд хяналт тавьж, мэдээ тайланг Улсын онцгой комиссын ажлын албанд 6 дугаар сарын 10, 11 дүгээр сарын 10-ны өдрийн дотор тус тус ирүүлэхийг холбогдох комиссын гишүүд, дарга нарт үүрэг болгосугай.

ДАРГА



С.АМАРСАЙХАН

УХА0168